



Chamna Aṁ

(A Monthly Organ of the Evangelical Synod Church)

Vol. XXXVI

No. 2

May, 2020



SAICHANG BIEL SUONGDAWH
HAW AT SANTING

2020
KUM
THUPI:

“NA INSUNG HIHTUP IN”
ISAI 38:1

Editor: Rev. T. Kamgin Gangte

**Vol. XXXVI No. 2
May, 2020**

Editorial Board

Chairman:
Upa Dr. L.S. Gangte, M.A. M.Phil.

Editor:
Rev. T. Kamgin Gangte, M.Th.

Asst. Editor-cum-Circulation Manager
Rev. Khaitinthang

Bible Study:
Pr. Khailalsiem M.Th.
Evan. Paukhomang B.D.

Contributing Editor:
Upa Paozalun BA
Rev.Khaigin BD
Rev. L.Sata B.Th.
Rev. Thangkhosiem M.Div.
Rev. T. Kampu M.Th.
Rev. Henkholien MBS
Miss Chinbawi MRE

Editor ana hite	
1. Upa Lalkhoin	1986
2. Rev. Khaigin Gangte	1987-2005
3. Rev. Lamkhawsat	2006-2013
4. Rev. Thangkhosiem	2014-2017

CHAMNA AW PHUNGVUKNA DING

1. Chief Patron	-	₹ 5000.00
2. Patron Member	-	₹ 4000.00
3. Diamond Member	-	₹ 3000.00
4. Gold Member	-	₹ 2000.00
5. Silver Member	-	₹ 1000.00

contents

- Editorial..... 01
- Pentekost 'Ni 50' 02
- Nu..... 05
- Sapchuom sepding/thiltup..... 07
- Israel gam apat hipi chuh a kithiel dawk tai 11
- Akigen gimneihum Corona Virus 18
- Kituoklohma leh a sukdamna ding bawl dan 24
- Saichang Biel Sapchuom puitu masate 28

- Kumkhat lakman Rs. 200/-
- Thusuoh nuom nei te'n ESC Office Post Box-54, Chiengkawnpang, Churachandpur a thak ding.
- Ala nuom leh a man pie nuom te'n circulation Manager, hetsak ding.
- Thukisuo cheng hi ESC Ngaihdan ahi vek khel puoi. Article zikte'n a mawh a kipuok chiet ui.

PRINTED AT
THAWNSAAU PRINTING WORKS
CENTRAL LAMKA

Editorial

Pathien in lei le van a siema, khawvela thil umte cheng cheng hile a siem ahi. A siemtu chun a thilsiem haw chu banga mat ding ahim tih leh bangtik hun a mat ding ahim tih ahe vek hi. Chun, a thilsiem haw chu apha leh a sie ahet vek ahi kit hi. Pathien thilsiem haw chu mihiem in hetsuok kei tih a um thei puoi. I het le I hetloh le mihingte tuok theih dinga asiem vek ahi. Zie a I tuok dan ding chuh kuomah agen masa thei ki um dieklo ahi. I tuok khak dan ding he masa kileng unle, zie I tuok dan ding chuh nang leh kei hihna a pat hiding ahi.



Pathien thilsiem I vak gen gen uhi chinih in vak kikhen taleh: khat chuh, 1. Mihiemte siet theihna dinga a siem ahi a, a khatzawk chuh, 2. Mihiem te phat theihna dinga asiem ahi kit hi. Zie a thilsiem chinih khen a um hih nonêl tak in a chuom chuom in vak gen khen zieng thei puoi ting un. I gen nawp zawk chuh, (genchien suok kei zo ding hikileng unle) bang ti a, bangtik hun a amat guot ahim! tih zawk hi ahi.

I Bible ah, “Chun, Pathien hehpihte, amah guot guola asapte ding chun, a phatna ding un bang cheng ah asepsak sek hi,” tih I muu hi; (Rom 8: 28). Zie thu hi gun tako I ngaihtuoh ding uh a deih um mah mah ahi. Zie a Bible châng dungzui hin: I phatna dinga a siem chule I phatna ding ahi a, I sietna dinga a siem chu le I phatna ding ahi, tinuom I hi. Pathien thilsiem chinih a I vak gen hih ti chun ana um tadih leh a diektak a I vak gennuom dan chu thilsiem haw hi matchâk a aneih theih vek ahi.

Tu hin a chung lama I gen guol in ngaihtuoh ngai mahmah chuh, eimah leh eimah ki etchien a, eimah hihna zil a Pathien thilsiemte tuok ding I hih uchun, A thilsiem haw mihingte phatna dinga a siem haw chuh ken ka mang phachuom na dem? Kei a dinga ka sietna ding mawh, ka damna ding? Corona Virus hih sietna a mat theih ahi a, phatna a le mat theih ahi, zie chuh eimah mimala um chiet ahi. Zie ziek chun, Pathien in a thilsiem haw amat hun a um a, a ut phat phat leh a a nawp nawp hi nang le kei siemphatna ding hin amang zieng sek hi.

PENTEKOST ‘NI 50’

- Rev Dr Ellien Gangte

Lalpa’n Israelte Aigupta gam apat a puihdawk, a pawtdawk zan uh, saltang zalenna ahih hetzingnaa Chieh-kan Kut amat zinguh ahi. Chiehkan Kut apat Ni 50 atitni’n Sinai Tang a tung u a, Lalpa’n Mosi mangin dān apie a, ‘Pentekost Kut’ amat pan uh ahi. Grik pau a ‘Pentekost’ chu ‘Ni 50’ tihna ahi. Judeate’n Pentekost Ni amat dan uleh ei uh matdan kibanglo ahi. Judeate dinga Sinai Tanga Dān piek a, aum niu melchikna ahi a, ei uh a dinga ‘Dān-thak, Thagau Thiengho’ pieka I um niu ahi. Thuthun Lui ‘Dān piek a, aum uh hetzingna hilo a, Thuthun Thak a, Thagau Thiengho Dān-thak I neih tak uh hetzingna a kimang ahi. Krista Isu Thisan in I gitlohnau chengcheng ei ngaidam tai tih I ginchak ngamnau hi Thagau Thiengho zal ahi. I pienthak apat Thagau Thiengho in ei chenchilh, Thagau Thiengho piek a um I hi tau hi. Thagau Thiengho puihna zala Krista Isu deih banga Kristien hinkhuo I mat dinguh ahi.

1. PENTEKOST NI: Chun, Lalpa’n Mosi a hopih a, Israel chate hopih inla, a kawm u ah, Lalpa guolvakna hunbi, khawmpি thiengtho a na siem dinguh kut haw chuh ziehaw hi ahi, ti’n gen in. Thiempudante 23:1-2. Chun, chawlhní sagih tin ni zing chana chuh ni sawmnga na sim dawk dinguh ahi zie ni chuleh Lalpa kawma buh thak thillat dang na lat kit dinguh ahi. Thiempudante 23:16. “Zie hun tieng chuleh hiti hi hung hi’n tin, mi chengcheng chungah ka Thagau sungtha’ng ka ting; tichun, na chapa teu, na chanu teu in ka thu gen un tin, na teksie teu in mang in mat untin; na tangval teu in kilâkna mu’n au. Joel 2:28. Tichun, Pa kawmah ngén ing ka ting, Ama’n Lungmuonpa dang nanguh hun pie’n a, kumkhuo a na kawm u a um dingin. Zie chuh Pathien chanchin diktak phuongdawk sek Thagau chuh ahi. Vannuoi in zie chuh a nei thei puou hi, Amah a muh loh u a, het le a het loh ziekun. Nang haw’n vang, na kawm u

a A um zing ziek leh, nangmau a A um ziekin, Amah chuh na heu hi. Johan 14:16-17. Chun, Lungmuonpa Thagau Thiengtho, Pa'n, ka min a A hun sawl ding khan, zie chun bangakai nanguh hun sinsak intin, na kawm u a ka gen chengcheng kha hun het dawk sak kit ina. Johan 14:26. Chun, ngaitiem u, Pa thil tiem chuh na chung u hun sawl ding ka hi; himahleh, chunglam apat a thilhih theihna'n a hun thuom masang sieh chuh, khawpi ahin um zingun" A ti a. Luke 24:49. Tichun, hatkhat in, van apat in thil gi, huihpi nung guolin a hungtung ta phut a. Zie chun, a chutna In u chuh a hihdim vek ta a. Chun, lei haw chuh mei guola kihawm zak in, a chungu ah a chu ta a. A bawn un Thagau Thiengtho in a dim vek tau a, Thagau in a pau sak guol zelin, pau zatchuom in a hung pau tau a. Chun, khawvel gam tin apat a hung khawm; Pathien limsak Judeate chuh Jerusalem ah a châm u a. Tichun, zie gi chuh a zak phet un, mipi a hung kikhawm u a; mitin in, sawlchakte thugen chuh amau pau chieta a na zak ziekun a lungzing ten tau a. Nasepte 2:2-6.

2. THAGAU THIENGTHO THILPIEK: Chun, suohpihte, Thagau lam thilpiek thu na zik thuu akhan a hih leh; Suohpihte haw, a chanchin diktak na hetuh ka hun deih hi. 1Korinth 12:1. Zieziekchun, kuole, Pathien Thagau puah a um ta chun, "Isu chuh hansie dawl ahi," a ti ngei puou a; kuole, Thagau Thiengtho puah a um lo chun, "Isu chuh Lalpa ahi," a ti thei diek puou ui, tih na hetuh ka nuom hi. 1Korinth 12:3. Ahih leh, na sapum u chuh, na sung u a um, Pathien kawm apat na muh uh, Thagau Thiengtho In ahi tih helo na hiu hi leh? 1Korinth 6:19. Chun, Thagau thilpiek chuom chuom a um a, a piepa Thagau vang chuh khat ahi. Zenviel dân chuom chuom le a um a, himahleh, Lalpa chuh khat mai ahi, Nasep theih dân chuom chuom le a um a, himahleh, zie nasep theih dân chuom piepa, Pathien chuh khat ahi. Himahlele, mi chengcheng phat guol na dingin, Thagau hetsakna chuh, mi tin kawmah bang lam ahim khat a piek chiet ahi. 1Korinth 12:4-7. Hehpihna hi delh zel unla, Thagau lam thilpiek haw hi utcha zingun, chun, thu na gen theihna ding u chuh utcha chuom pên un. 1Korinth 14:1.

Mi khat kawmah, Thagau chun, chitna thu a pie a; khat kawmah, zie Thagau mah chun, hetna thu a pie a. Mi dang khat kawmah, zie Thagau mah chun, taksanna a pie a; chun, mi dang khat kawmah, sukdam theihna thilhiah theihna a pie a. Midang kawmah, thilmak hih theihna piek ahi a, midang kawmah; Pathien thugen theihna piek ahi a; chun midang kawm achun, Thagau apat a thilpiek hungte het dik theihna piek ahi a; midang kawm achun, pauchuom chuom a thugen theihna piek ahi kit zela; midang kawm achun, pauchuom chuom hilhchet theihna piek ahi. 1Korinth 12:8-10. Himahleh, zie thil chengcheng chuh Thagau khat in, mitin kawmah a deih bang zel in thilpiek chuom chiet a pie sek hi. 1Korinth 12:11.

3. THAGAU THIENGTHO GAHTE: Chun, Pathien Thagau Thiengtho chuh sulungkham kiu in, tatna ni a dingin Amah a chuh mawhuol kinam na hi ngâl u a. Ephesi 4:30. Thagau mawng chun, eimau haw thagau tawh, Pathien chate I hiu hi, tih ei

hetpih sek hi. Rome 8:16. “Thing hi a phat chun, a gah le a pha a, thing a phatloh chun a gah le a pha puoi; thing chuh a gah in a kihe ngâl a. Matthai 12:33. Na gitlohnateu na haihsan ui tih het theihna ding thilte chuh hih un. Matthai 3:8. Tu zieng hin le heicha thing bul tin ah a kawih tau hi; khutichun thing tin, gah pha suoh lo cheng chuh phuk in, mei ah a pah sek ui. Matthai 3:10. “Kei grep gui chuh ka hi a, nang haw a bâk na hiu hi; kuole, keimah a um zinga, keile amah a ka um zing na chuh, zie mah chuh tamtakin a gah sek hi; keimah lo in bangmah na hih thei ngâl puou a. Johan 15:5. Himahlele, Thagau gah vang chuh: hehpihna haw, lawpna haw, kichamna haw, thuokhatna haw, nunnemna haw, phatna haw; taksanumna haw, Kingaihniem na haw, kidêk theihna haw ahi zawi. Khutibang kalh lam chun Dan thupiek himhim a um puoi. Galati 5:22-23. I hinkhuou a Thagau gahte haw a gah ding bang taka gahsak a, Krista Isu zala Kristien hinkhuo kituptak a mang a, Lalpa Pathien kawm, Vangam I tun chiet uh I kideihsak uh ahi. Amen!

NU

-Aziktu hetloh

1. Hun khat hi nausen hung pie'n a guo a, Pathien kawm ah Lalpa ka pien hunla anai ta ngal a. Himahleh, khawvel a la ka pieng kha nai puo a, bangti'n ka umzel ta die? Ei duottu leh panpihtu ding le ka neih ding ahim? ti'n lungdawng tak in a dawng a.
2. Pathien chun, "E khai lunggim him him ki'n, ka Angel tamtak laka nang hun enkawl ding in Angel khat ka guot diem sa ei tai. Amah chun na pien thak thak leh duot takin a khut in hun dawm in, hun pawm intin, nunnem tak in hun enkawl ding ahi," ti'n nausen chu a dawng a. A kipak ziek in nausen chuh a nui keuhkeuh a. Lalpa Vangama hin nuih le ka thiem ta a, la le ka sa thei tai a ti a, "Aleh lei ah chun kuon ei nuihpih in, la ei sakpih ta die?" ti'n dawng kit a.
3. Pathien chun, "Nangmah enkawl ding a ka guot chun hun nuihpih sek intin, lawptakin la le hun sakpih sek ding ahi chu, ti'n a dawng kit a. Nausen chu amasa guol khan a thugen chu ngaihthak nuom sa'n a nui kit keuhkeuh a. Himahleh, a kipahna mel chuh lungngaihna mel in ahung kitheng phut a. Pathien masang a chun a bawk vak phei a, a khupte nih chu tu kawm in, "Lalpa, lei a mite'n ei hopih leu bang ti'n ka dawng ta die? A pau u lah he thiem lo ding ka hi ngal a," a ti kit a, a lunggim takzet hi tih a mel apat chun a het theih a.
4. Pathien in nausen khut chu diem tak in a hun tu a, akai dinga. Nausen kawma chun "Nangmah enkawl dinga ka guot Angel chun na het laklaka pau hawih penpen in hun hopih sek intin, duottak in hun pawm intin, deihchuom tak in apau ule hun sinsak sek ding ahi," ti'n a gen kit a. Nausen chun Pathien chu amai bul ah ava naih a, ahihleh, Lalpa, nangmah hi hun hopih nuom ta bangleng bang ti'n ka hih ta die?, a ti kit ta a. Lalpa chun nausen chuh duot tak in avak pawm a, a kawm achun, "Nangmah enkawltu Angel chun na khutte nih in hun

kai in, kei mah nei hodan ding hun sinsak sek ding ahi chula,”
ti’n a dawng kit a.

5. Nausen mel a chun lauhthawnna leh beidawnna ahung langkit a. Thafang mel tak in “Lalpa, lei a cheng mihiemte chuh migilo tak in a gen ua, kei nausen hatlo leh mahni kiveng thei lo hi kuo’n ei hukbit ta die?” a ti a. Thafang tak in a hat chu akinawh het hut zienga.
6. Pathien chun nausen chu duot tak in a vak kawi a, “Nangmah enkawltu Angel chun a hinna guol in hun ngaikhawk ding ahihziek in, bangtik lai inle hun hegih lo hiel ding ahi. Zieziek chun a hinna tuk in nanga ding in pang sek ding ahii, a ti a. Khutichun, kinlebuong in nausen mel achun thamuonna ahung lang ngal a. Nausen bawk chun, “Lalpa, I kimuh kit hak ding tawh ka thawmhau na ding e maw?” a ti kit ta keuhkeuh a.
7. Pathien chun nausen chu a malpi ah a chutsak a, kun in abil bul achun, “Nangmah hun enkawltu Angel chun zie mun a na hungna ding in deihchuom tak leh ut tak in ka chanchin hun hilh sek ding ahi. Keile, na kieng ah ka um zing puoh die,” a ti a. A kiho lai un Vangam chuh a thip chut a. Nausen chu lei a a chieh hun ding tak tak ating tai tih a he a. Atawpna’n kinawh tak in dawtna a dawng kit a, “Lalpa, lei a ka chieh masang in kei mah ei enkawl dinga na guot Angel min chu nei hilh thei die,” ti’n a dawng kit a.
8. Pathien chun nausen chu a en vung vunga, ”Angel min chu a pawimawh penle ei puoi, “HE NU” ti a na sap sek ding ahi, a ti ta a.

Lalpa’n nute cheng cheng athak in malsawm chiet ta hen. Amen.

*A suohtu: SM/Clk. Paukhogin,
Mantripukhri, Imphal.*

SAPCHUOM SEP DING/THILTUP

(MISSIONS OF THE CHURCH)

Sapchuom: Sapchuom hih Lalpa a ahi a, a phutdawktu leh aneitu chuh Isu Krista ahi a (Matt. 16:18), Thagau Thiengtho puihna leh sukhatna nuoia chieh ahi (I Kor. 10:17; 12:5-27; Rom. 12:4-5). Zieziekchun, sapchuomte hin kipak kawma a neitu enzing kawma, sapchuom thiltup leh sepding pen chuh asep dawk zing ding ahi.

Chun, sapchuom hih Pathien Program/thilguon khat ahih na a, a kipat tung a um a, atawpna ding um ahi. Zieziekchu, zie Pathien program a tel kha ihih hi vangphat um tak ahi a, adiek tak in, zie Lalpa sapchuom enkawltu dinga mawhpuokna pieka I um sung ahih, Lalpa'n Sapchuom manga a sepdawk nuom haw hih sepdawk tei dinga hih panlak zing ding ahi.

Sapchuom dinlawhpen or a thiltup hih thilchuom chuong genkhawm ding um na'n a, ahinlah apawimawh diek khenkhat ana enkhawm hitiu.

1. Khawvel muntin a chieha chanchinpha gena, nungzui siem ding:

“Khutichun, chieh un la, namtina mi **sinsak in** siem un la, Pa leh Chapa leh Thagau thiengtho min chun baptist un la; Chun, thu ka

hun piek chengcheng hi pawm dingin hilh un. Chun, ngaitiem u; Kei, kumkuo'n, khawvel beih tiengin le na kawm u ah um zel ing ka,” a ti a. Amen”. (Mat 28:19-20), “A kawm u ah, “Khawvel pumpi ah chieh un la, thilsiem tincheng kawmah **Chanchin Pha gen un**”. (Mar 16:15)

A chunga Bible chang kipie hih phataka I et leh, Sapchuom dinlawhpen leh a sepdingeigen sak hi. Zie chuh **Chanchinpha gen leh Nungzui** dinga siem (Evangelism & Discipleship) hih ahi. Chanchinpha gen leh Nungzui a siem hih Lalpa Isu nasep thupipen le ahi. Zie thil nih hih, khen theihlo ahi. Chanchinpha gen/ Evangelism hih Lalpa Isu Krista chanchinpha gen a, zie apat chuh Pathien tawh misuol te ki chamsakna nasep ahi.

Chun, Nungzui/Discipleship hih Lalpa Isu nungzui ginum dinga siem leh Isu thupiekte banga hing dinga midang siem na hih ahi.

A. Chanchinpha genna:

Sachuom sep ding pen chuh, Lalpa Isu sepban sepding hih ahi (Jn. 14:12). Lalpa Isu'n, "Mangthaite hawla hukdam dingin, Mihiem Chapa hi hung ahi him hi," a ti a". (Luk 19:10) Isu'n nungzuite asap lai in, Isu'n a kawm u ah, "Ei zui un, tichun mihiem man dingin hun siem ing ka," a ti a. (Mat 4:19) Isu'n a nungzuite chuh mihiem man ding in ana sinsak hi.

Paul in zie thupiek chuh zui in, "Ziehaw chengcheng chuh Pathien thilhiah ahi a, amah chun, melma hihna apat in. Krista zalin amah tawh kicham in ei siem a; *mi dangte le amah tawh kichama siemna dinga, zenvielna nasep chuh ei pie tai*, (2Co 5:18). Pathien leh mihiemte kichamna nasep hih Pastor te, Upate leh Evangeliste chauh in a sep ding uh hilo in, micheng/piengthak cheng sep ding ahi. Chanchinpha nasep theihna lampi chuom chuom haw...

a. Personal Evangelism

I. Lalpa Isu leh Personal Evangelism.

Mimal ngaihkhawkna Isu'n anei hi.

1. Andrew, John, Peter, (John. 1:35-42)
2. Philip leh Nathanael (John 1:43ff)
3. Nicodemus (John 3:1f)
4. Samari Numeinu (John 4)
5. Zieng leh alawite (Mk. 2:2-12)
6. Bethesda dil a damlopa (John 5)
7. Gaderene a thithabuok vawp (Mk. 5:1-20)
8. Mitduk nih (Matt. 9:29-31)
9. Zawlsai numei (John 8:1-11)
10. Zachaeus (Luk. 19)
11. Pilate (John 18; Luk 23)
12. Guchah nih (Luk. 23:32-43)

II. Nasepte lehkhabu apat a Personal Evangelism

1. Peter leh Johan Temple a kengbaipa tawh (Acts. 3:1-11)
2. Philip leh Simon (Acts 8:9-13)
3. Annanias leh Tarsus khuo a Saul (Acts 9:10)
4. Peter leh Cornelius (Acts 10)
5. Paul leh Sailus tawh Suongkul vengpa (Acts 17:24)

6. Paul leh Sailus tawh Lydia (Acts 16:12-15)
7. Paul tawh King Agrippa leh Felix (Acts 23; 24)

Chanchinpha gen na dinga na mat ding Bible chang Rome lehkathak_apat - The Romans Road:

Romans 3:10; Romans 3: 23; Romans 5:12; Romans 6:23; Romans 5:8; Romans 6:23b; Romans 10:9, 10; Romans 10:13.

- b. Missionary a kuona chanchinpha nasep septheih ahi
- i. Profession chuom chuom (Doctor, Nurse, Teacher etc. etc.)
- c. Inmun a um zing kawma Chanchinpha nasep septheih ahi
 - i. Pauchamna
 - ii. Thilpiek

B. Nungzui siemna :
Chanchinpha gen sanga haksa zaw dinga lang leh haksa zaw chuh Nungzui siem pitinna hih ahi. Nungzui hingala, a zuihpen helo tih vang um ding in ginchak a um puoi. Ahinlah tulai sapchuom dinmun iet leh, a zuih helo hiel hileh kilawm sapchuom lak ah tam tak a um hi. Sapchuomte hih Lalpa Isu nungzui ihiu a, I zuihtu pen nungchang leh mizie hih

I ettawn ding ahi. Sapchuom mawhpuokna leh sepding lien mah mah khat chuh nungzui piting siemdawk hih ahi. I umna sapchuom chuh Nungzui siem sapchuom ahim? tih hih guntak a etphat ding ahi. Nungzui siem sapchuom ihih loh chun, Lalpa thupiek zuilo sapchuom hi ding ihiu hi.

2. Pathien Ho-Khawmna leh Kipawl khawmna mun ahi:

“Mi nih ahim, thum ahim ka min a a kikhawpna tak u achun a laku ah ka tel sek hi.” a ti a”. (Mat 18:20)

Mihingte Lalpa’n, Amah kipakna ding, lopina ding leh Amah ho dinga a siem ahi. Adiekta in Sapchuomte hih amah a dinga A chapa thisana a chawk ahi tai. Zieziekchun, Sapchuom hih Lalpa Ho na ding, amah biekna ding leh amite kipawlkhawm na dinga Lalpa’n aguot ahi (Thup. 4:11; Jn.4:23). Sapchuom hih Lalpa I hehpihna suklatna ding leh khat leh khat I kihehpihna suklatna ding ahi (Mark 12:30-31).

Sapchuomte kilungsiet tuoh tak leh kihethiem tuoh tako umkhawma, Amah hokhawm hih a kipak lam ahi (Eph.

4:1- 4; 1Jn. 1:7). Zie tawbang kipawl khawm na ahin, Lalpa umpihna suklat ahi seka, ginglo mite ding inle vak lopitak ahi sek hi (Jn. 13:35). Gingtu masate'n Lungsietna Ankuong ana um khawm sek ui (Nas. 2:46; 20:7).

Tulai tak hin, khawvel hih Hip'i'n a bawm a, kikhwawp khawmna leh a pawla thil bawl alem ta puo a, himahleh Lalpa zala kipawl khawm kit theih hun ahung um kit iki nema, zie hun tieng chuleh Sapchuomte kipawl khawmna hih ngaihkhawk mah mah ding ahi.

3. Gingtute pitinna mun ding leh semtu dinga kisaklawkna mun ahi:

“Amah mah chuh, “mihingte kawma Thilpiek,” piepa chuh ahi; khenkhatte chuh sawlchak dingin a guot a, khenkhat chuh thiemgau dingin, khenkhat chuh, belampu ding leh

khenkhat chuh sinsaktu dingin a guot a”. (Eph 4:11 cf. Rom. 12:6; I Kor. 12:14-31).

Sapchuom hih Lalpa nasem dinga kisinna, kisaklawkna munpi ahi. Pathien Thu leh La chien tak leh thaneitak a kisinsakna mun ding ahi.

“Chun, hehpih leh thilpha bawla kichawktho dingin kingaihtuoh pih chiet hitiu; Mi khenkhatte hih dān guola, I kivawpkhawmna sekteu haihsan diek lo in, kitilkhoh tuoh zawi tiu, Lalpa Ni chuh hung nai tel tel a na het u hin, kihah til zawsem sem un”.

(Heb 10:24-25)

Sapchuom thiltup leh sepding tampi gentheih umlaka, a pawimawh dieka ngaihte hun kisulang ahi a, Sapchuom thiltup hi he a, I umna mun chieta Laapa Taksa siemphatu a pangchiet ding in Lalpa'n ei vangsak ta hen.

ISRAEL GAM APAT HIPI CHUH A KITHIEL DAWK TAI

(1 Khangthubu 21)

- *Pr. Soilal Gangte*

Leng Saul zagh in Israelte leng chu leng David ahung hita a, leng ahih masang apat inle a lawhting mahmah hi. “Saul in asang asang in a that a, David in asing asing in a that hi” (1 Sam.18:7) tih chu Israel mite kiko thawm ana hi. (1 Kh.13-19) David hi Pathien mi tak ahi a, Pathien Thugawlh bawm le Jerusalem a laklutna ana nei hi. Zie mai chu hilo in Israelte melma lientak Philistia te chung a le guolzawhna ana chansak a, gam tampi le ana la’i. Lalpa’n leng David mang in Israelte hi a umpih a nasatak in a vangsaka a hat mahmah mai ui.

Zie banga leng zah-um leh galhat chung ahin Setan in pan nasatak ahunla a, David chuh sukbuoi a nuom ta ahi (Dinmun sangtak a umte ding in thepna hi anasa a, gitloh bawl hi ana baihlam mahmah dan ahi). Leng David in Lalpa a kipat hatna a neih lam hengilh in, a lungthima kisuonna leh kiletsakna ahun nei pan ngal hi. Lopina leh hatna amah a um hihsak in a mite bangzah ahih henuom in “mi simnawpna” ahun nei a, Beer-sheba a kipat Dan tieng a mi simding chun Joab leh a miliente a sawl hi (v.1-2). Zie hi leng David in Lalpa ma a thil gilo thupitak a hihte laka khat ahi (Bathshebi tawh a zawsainha sim in).

Sepaih lawiupa Joab in leng kawmah, “Lalpa’n a mite hi, aleh zakhat in hihpung lele, hepu, na mite ahi vek uh hilo ahim? Bangati a henuom na hi? Bangzieka Israelte thiemmawh channa ding hih ding” (v.3) ti’n thil diklo ahizie a kawkmuh hi. Zie thil gilo Setan a kipat leng David lunggil a hunglut chuh azawhna ding hin Pathien a kipat lampi dik kawkmuhtu ding aum hi tih i muthei hi. Mahleh, zie chu ngaihsaklo in, mihing umzah chu a sim

thotho hi. Israel gama galdo thei mi chu maktaduo khat leh nuoikhat, Juda gam ah nuoili leh singsagih ahi tih Joab chun lengpa chu a hilh hi (Levi chite leh Benjamin mite simloh in), v.4-6. Leng David lopi a kisak zieka mi a simna a chun Pathien a lungawi ta puo a, Israel chate chu a gawt ngal hi (v.7).

[Anuoi a sem sepaih lawiupa pa thu kha ana mang le zie thilte haw hi tuoklo ding hiven maw?]

[Leng David, Lalpa lunggil bang pu (I Sam.13:14) ahih bang in] Lalpa lunghim hi ana he mahmah a, a thilhik zieka Lalpa a kipakpuoi tih a het het khan Pathien kawmah ‘ngaihdam’ a ngen ngal hi.

“Zie ka thil na hih ahin nasa takin ka na gilo tai; himahlele na suok manlohma hi lungsiet takin ngaidam in. Ngawlhuoi takin ka na hih ahi tai,” (v.8).

David pauchamna leh a lung kihei zieng dan hi i vak ngaithuoh leh, a gitloh pawm zieng thei mi ahî tih amuhtheih hi. Ei lawi kihi leh gilo kikisalo maithei ahi. Ahilo tawp inle, i pû Adam bang in suonlam bangzah siem

in, mi kuo ahim chu kingawh têtéi maithei. Pathien masang ah ‘gilo’ i hih kimuhchetna/ kihetchetna hi apawimawh mahmah a, zie chu Pathien zahngaihna leh ngaihdamna i channa theih lampi umsun chu ahi.

[Leng David hi Eden huon akhan Adam dinmun ah ana ding le chuh, Pathien lungnatna (sapsietna) hi mihiemte kichang khello maithei.]

Pathien lam hephalo a thil ngawlhuoi tak (mi sim) ahih zieka chun, Pathien a kipat thiengau Gadchu David kawm ah sawl in a um hi. A gitlohma chu kisik mahleh, a gitloh zieka chun Lalpa vahawmna thu chu ahungtung tho tho hi. (Bang ti zâwng ahîm in chuh, gitloh man chu i piek têi ngai ding dâñ ahi) Lalpa’n David kawm a chun thil chi thum tel ding a kawih sak hi: i) kumthum kiel kiek ii) Melmate apat a tha thum delhang a um, chun iii) Gam chung pumpi a hipi lén saka, a vansawlchakte manga gam pumpi chung a thihna ahun tunsak ding (v.12). Zie thil thum lak a chun David in athumna “Lalpa a kipat gawtna” chu a tel hi, aziek hi Pathien a hetchien zieka hidig

ahi. “**A zaidawh thei ngâl a**”(v.13) a tih hin mihiem khut sang in Pathien khut a chun lungsietna a um tih hekawm in Lalpa a kinepna nei hiding ahi. [Mihiem khut a taih taih zieng le chu akhawp himaithei maw? (Leng Saul leh a chapa Absalom khut a kipat ana tai tai ahih ziek khan)]

Abang chu hileh, gitlohma a i puk phat leh, Lalpa khuta kipiekthâk hi bawl ding dawl chu ahi. I dikna hawl ahim, midang ngawh ahim hin chu, Pathien lungnatna supuong zaw ding leh ngaihdamna chu kichanglo ding ahi.

Leng David gitlohma ziek chun Lalpa a kipat gawtna, a gamsung a hipí chu ahungtung ta ngéi a, mi singsagih in a thih lawh ui (v.14). Hipí hi Lalpa a kipat gawtna hung chu ahi maw? Tua ei hipí **Covid-19** i tih u hila? Lalpa a kipat ahi tih i pawm thei dem? Aziek hi bangziek, kuo ziek ahi dem? Leng David bang in, ei mihiemte hin Lalpa ma a gilo I hihzieu hi I kisik apawimawh hi. Gambung lien takakte akingawhtuoh guol u hin, ei te chu i kingawhtuoh puoi. Hinla, zie hipí a kipat hin bang ei zildawk sak em?

(Thil bangkim hi Pathien lopina dinga siem ahi) Pathien lam naihna leh a lopina muhna a i neih apawimawh ahi. Gitloh simna hun in i mang em? Thilcheng chunga Pathien thuneih zie i mudawk em? ‘Politicize’ ahihloh le ‘kingawhtuoh’ ahim hi, hipí chung a i thilbawl ding dan ahi puo a, Lalpa a kipat hung ahiziekin “gitloh simna hun” a i mat chun a lopina mu’i ting, a ngaihdamna leh a sukdamna chuh chang ding i hi.

[Leng David kha chu, leng hizieng lele Pathien in na gilo hi a tih le gentamlo in a lalchutpha a nusieh a, saidip puon silh a gitloh kisik zieng thei mi ahi. Ei te la aw, na gilo hi ei kiti thet leh...]

Thuchingte 3:12 na chun tihin agen hi, “Lalpa chun a hehpih tâk chuh a hilhgaih sek a, pa’n chapa a hehpihte a hilhgaih sek bangin.” (Hebrai 12 na le sim téitéi in)

Lalpa’n aphal ziek a Israel gam a hipí ziek a mi tampi athih bang khan, eilak a hipí hile Pathien in aphal ziek a hungtung ahi a, zie hipí a kipat hin Lalpa’n ei vengbit thei ahi tih le itaksan apawimawh kit

zel hi. Zie chu bangti i chan dem? Bangti'n pan ila dem? Gitloh sim leh gitloh kisik ding hi David a kipat izil leh imuh u kha ahi a, zie bang chun eite le Lalpa ma a ikipliethâk ding ahi. Lalpa ibelh chun, a lungnatna chu hungtung ta lele "Lalpa chu a zahngai ngal a" tih hin ei hukdam ding kinepna ei pie ahi, aziek chu a chate a hehpihte ihi ngal ua.

David gitloh (mi sim) ziek in Israel gamsung a Lalpa vaihawmna chu ahungtung ta ahi. A vansawlchakte mang a Lalpa'n Israel gam ahihsiet zing lai chun Pathien in Jerusalem a lungsietna alatsak hi.

*Pathien in Jerusalem khuo
hihsie dingin vânsâwlchâkte a
sawl a, a vak hihsiet ding kuon
tak u chun, Lalpa chun a vak
en a, thil phalo hih a guot chu
a lung a hei a, tichun, mipite
hih mangthai vânsâwlchâk
kawm achun, *“Hih ta ki'n,
zie kha a hun tai!”* (v.15)*

Pathien in achate hi chu ahumbit nuom ahi tih amuhtheih hi. Hipi nasatak ziek a thihna'n Israel gamsung vai a hawm lai in, leng David in agitlohma ìmlo a Lalpa ma a agitlohma asim ziek khan, Lalpa Pathien a kinepna aneih

bang tak in, a "zahngaihna" chu achang ta ahi.

Gilo ihiu! David Lalpa lunggil bang pu pa le gilo ahih chun eite vangvang, kuomah diktat himhim i um puou a thiding a lawm ngen ihiu (Rom.3:10-23; 6:23).

*I Jn 1:9 “I gitlohnau I phuon
uh chun chuh, I gitlohnau
ngaidam ding leh, I diktat
lohnau chengcheng tauh ngim
dingin, amah chuh a taksanum
in, a diktat ahi.”*

Lalpa vansawlchak in Jerusalem ahihsiet ding kuon a Pathien in *"Hih ta ki'n, zie kha a hun tai"* tih thupiek aneih hi ei uh chung a hinle ahihnuom leh ahihthei ahi. Zie chu i chantheihna ding in gitloh kisik a Lalpa kawm a ikipliek thâk chun, i gitlohma'u ei ngaidam intin, inatna teu ei hihdam ding ahi. Jerusalem a hipi atûktân bang hin, ei uh gamsung a le atutâng thei hi, zie hipi hile Amah siem Amah a kipat ahingal a. Thilcheng hi Athu bangzel a um ahi him hi.

[PATHIEN thil chengcheng Siemu hi a kichawl nailo ahi. Tuni chan in a vaihawm zing nalai hi (Sovereign God). A umlo umsakthei a

umsa sumangthei Pathien ahi,
zie ziek chun Amah kawm
a ikipiek thâkloh chun kuo
kawm i bel dem?]

Lalpa vansawlchak chemzâm zuk dawksa a Jerusalem chung zawna, lei leh van kikala ding chu David leh upate'n amuh u chun saidippou silh in, lei tuol ah a bawkkhup ngal ua. David chu Pathien kawm ah a paucham ngal a, a paucham na hi tuni hin ei u pauchamma le hileh deih a um mahmah ahi.

“Keimah hilo ka him, mipite sim dinga thupiepa khah? Keimah hi ka hi, thil na hihkhiel a, gitlohuoi taka thil na hihpa chuh: zie belam te hin banga him a hih uh? Aw Lalpa ka Pathien, keimah leh ka inkawte hi ei gawt zaw’n la, na belamte hinna hi hawi in” (v.17).

Eimah kimuh hi apawimawh mahmah hi. Adam leh Eve kikal a mîtmawh na, Abel leh Cain kikal a sukkhelhna haw hi; Lalpa ma a ei un i sukdkik theih na ding ua ‘Lalpa Thu’ hi zîk leh piek a um ihiu kitileh ki khiello ding ahi.

Luke 6:42 “Nangmah mita thing them lut chuh mu sam lo in, na suohpih kawmah, ‘Suohpih, na mita ninpa

neucha lut chuh nei lâkdawk sak ah,’ bangti dana na tih theih ding? Nang migukhah, na mita thing them chuh ladawk masa’n la, khutichun, na suohpih mita buok neucha lâkdawk ding chuh kichien takin mu thei inla.”

Eimah gitlohma muhtheih hi thil haksa mahmah chu ahi. Dik kisa tak a hinkhuo imatzing lai in, leh sukhiel ikisakloh zing lai in; Vak ngaihtuoh hitiu, leng hun a lengte thupi zie he kawm in, leng David in agitlohma upate lak a (milien milal te) phuong zieng thei ahih hi eichan ding in chu ahaksa mahmah ahi. Hinla Lalpa ma a agitloh a phuong a, zie ziek chun amah leh a gam a ding in “damna leh bitna” chu ana hi. Amah sang a amite damna ding gelkhawk zaw, amite ding a Lalpa ma akipie tha ngam. I gennuom chuh, a gitlohma akimuchetna leh Lalpa ma a akipiek thâk zieng theihna hi ahi. Gitlohsimna hi aki tasam mahmah a, “Aw Lalpa mi gilo kahih zie leh ka suol zie ei kimuh chet sak in. Nang a ding a pawmtâk kahih theih na ding in, ka gitloh ei simsak in” tih hi izil apawimawh mahmah ahi. A holim cheng la i phatna idikna

simthei ngen kih, Pathien ma ahin bangtieng in aki diktat dem maw?

[Mûkzawl ziek a vangam a ki genlut theilo ding ihih u hi akhawk eitai]

[Gitloh ngaihdamna hi taksa a ding a le damna hisel na ahi atih theih dem? Aziek chu David gitloh ngaihdam na kha agam a ding in le damna, hipi a pat venbitna ahih ziek in.]

Thiemgau Gad Lalpa vânsâwlchâk in David kawma asawl bang in, Jebus-mi Arauna buhphuol a Lalpa dingin maichâm ava siem hi. Maichâm asiem ziek chun mipi lak a hipi hi kithiel dawk ding tih ahi. Amun ding, amatchâk leh gan ding haw Araunah chun piek aguo a mahleh David chu nuomlo in sana sekел zagup in zie mun chu apie tai. Maicham a siem chu van apat mei in ahung kâng ta a, Pathien in a pauchamna adâwng a, vansâwlchak inle a chem chuh apai ah athun kit tai. Zie mun, Araunah phuol chu Pathien Ho-in umna ding mun chu ahi ngal hi (21:18-22:1).

Israel te hipi a kipat adam nau leh asuohchat nau chu,

Araunah buhphuol a maicham chu ahi. Zie mun hi tuni hin ei un le ikineih uh apawimawh ahi. Nang Araunah buhphuol la? (Mask?) Araunah Buhphuol (paucham) a ibawl ding u chuh: Gilo ihihzie kimuhchien a, kisikna ineih ding ahi. Pathien kawm a gitloh ngaihdamna le i chan têi ding ahi.

Leng David thupi kisatak a “mi simna” (kisuonna, Satan a kipat) aneih hi Lalpa ngaih in gitloh ahih ziek in, ei ten le Pathien panpihna ziek a tu dinmun itun hi ki uonna a imatloh ding ahi. Tuhin ei khawvel ah Covid-19 in vai a hawm a, tua gam asukkhak haw hi amah kisuong thei chiet te ahi kit gêt ve maw? (David khale akisuon ziek ana hi maw) Amau haw chung a vaihawm tu ding a Lalpa'n ahun sawl le hiding in ginchak a um hi. Tuni'n ei kawm ahung tung puoi, zie ziek chun diktat ihiu atih zieng theih loh ahi. A lungsietna chang nalai ihiu a, ei uh tawh kituok phet ding, i gitloh ziek ua ichung a vaihawm ding hi Lalpa'n ahun sawl thei ahi tih hezing pum in, Lalpa lau kawm in, eimah kisuonglo in, Amah lam enzing hitiu.

Zie gitlohma (mi simna) hi nang leh kei inle ina nei maithei hi, aziek chu chapona hi mihing a umvek ahih ziek in. David khale kigungmanlo in Satan thâng ah ana pûk ahi. Ki ngainiem tak a Lalpa lam enzing kawm a i umloh chun, Lalpa malsawmna leh lungsietna ichan na akipat hinle ei ah chapona hung pieng in gitloh ei hihsak thei ahi. Chingthei tak a um a, Satan thâng a kipat ikiven phat ding hi apawimawh ahi, danleh nang leh kei ziek in Lalpa a kipat hipi hungtung thei laizang ahi.

Zie gitlohma hi leng Hezekiah'n le ana bawl kha a zie ziek khan alenggam leh ahauhsatna a chân khawlawh hi. Nang leh kei in le, i suonding pen i suonloh chun, tua ineih sunsun hile ithihpih thei

naklai ahi. Leng Hezekiah inle ahauhsakna ahatna achapona athihpih hi atih theih hi.

“Mi’n ahun pahchak tieng leh chingthei in” tih hi kihilhna diklo hile kilawm, hinla thil dik mahmah ana hî. Aziek chu, pahchakna ihunlawh tam a ihung ki uon tieng leh, sukkhelhna chu imaban ana hinuom ten hi.

(II Kor.12:5, 9-10) Sawlchak Paul in vang,

“Ka zawnkhala lo chuh, keimah kisuong puo’ng ka”

Lalpa lungsietna chauh hi i kisuonpih ding ahi, ei a hin suonding bangmah ineilo ahi.

Simtu te Lalpa'n hun vangsak chiet u henla, Lalpa Pathien in zie hipi (Covid-19) a kipat hun vengbit chiet tau hen!

Ngetna

Chamna aw hi subscribe a, Articles a hun pie zing ding in leh subscriber ding hun hawla sponsor hun bawl zel ding in, chun aphung vukna ale pang dingin na tawmngaihnau leh deihsaknau Pathien min in ka hun ngen ui.

- Editorial Board

AKIGEN GIMNEIHUM CORONA VIRUS

- Evan.Paukhomang Gangte.

Krista zala suohiph deihtakte, Damna chibai,

Tuchung hin Khawvel pumpia, akigen gimneihum Coronavirus chungchang apat sermon ana ngaithai tiu.

Adin adêna sut guo chuh I hi puoi, hinla abulpatna dingin, zie natna ‘hik’ CORONAVIRUS hih China gam Wuhan khawpi ah Dec.31 in ahung kipana,zie apat chun khawvel pumpi gambung za nih lam hiel ah mihing 4,156,676 damloa kawiha, mihing 2,82,842 hinkhuo ana la leh, adiekin India mi 67,161 ana subuoia mi 2,212 thihlawhna ahia, adamkit vang mi 20,969 aum hi. USA ah ni khat thua natna vei atampen ni chuh, tuni May 5 ni hin (dakkal 24 sung) hin avei 3,900 aum hi. Chun Manipur ah mi nih avei muhdawk ahia,tun adam kit gel tau hi. Tuchung natna ‘hisie’ hih hun danga bang lo in China leh USA kingawh tuohin kuo siem ahim tih kichien lo mahleh atam zawn China hih thiemmawh achan chiet ui. Aziekchuh China Doctor Lee wenliengin tumasanga

SARS tawbang natna lauhum chuoplam khawih natna hik kikaihsawn theih aum hi, a tih khan mi sulau ti’n China police-ten ana gik ui. Akipatna muna ten alauh umdan im loin anagen dawk vak leu chuh,khawvel gamtin aphak masangin kiven theih ding hia tih ziekin tuhin Gam cheng in China ah componsation nget ding, International courta hek ding tih haw, aki hah gen laitak ahi. WHO in le im pih in,China alunghawl guo taluo i ti’n USA te’n World Health Organizationa sum thawh atawpsak ui. Khenkhatin Biological weapon dinga China siem hina ti lawi, khenkhatin Pathien in hi alen sak hina tih gingchapawl aum lai in,Scientist kimkhat in, zie ‘hik’ etchietna aneih lai un,zie hih Organism (ahing thei) ahipuo’n, akisiem mawngmawng hi dingin

agingcha tin-ten ui. Thuthang nunungpen ah, Dr. Shi Zhengli kitinu hin ganhing lamdangtak vacha hingal nawi chep sek ‘Bak’ a hik um leh synthetic virus (siemkawm hik) I helkhawm leh ganhing leh mihingte kikaihsawn theih ahih dan 2013 khan research paper ah ana zikin ana published daih tai ti’n akigen vengvung ta ahi. Awle Pathien hih lemuot athiem dan chuh, tuchung natpi ah hin gam changkang leh mipil gamte’n athuok diekua, lockdown in ahuomkhakloh mimawl leh thingtang gam ten hamphatna lienpi ichang ui. Kei uh phaigama umte chuh; Bazara mi kawma nai deuha idin leh cheng zanah lieu ding, muk I tuom hetngilh leh Rs.100, mipi laka chil isiet leh Rs.300/- lieu ding malzin hileh amah in hi leh Quarantine house zuon loa ei in iki zuot zieng leh cheng sangthum lieu tawh ni sawm leh li kulkhupmai ding ahi. Pathien um gingchalo, communist China hih Pathien in gawt ding isak lai in Kristien gam Italy, Spain leh America leh British-ten China sangin athuok zaw kit un, Pathien hih amite chunga lungawilo hoh ahi kha dem tih nawp aum seka, Aw Pathien

zie covid-19 ah hin nang hung kichawisângin tihloh gen ding aum puoi. Ziehiah, COVID-19 battle tinele akigen hi aziek chuh galpi khatna leh nihna sangin mi a thi tamzaw tai. Tu masanga I na het khak loh uh coronavirus Lockdown, Quarantine tih haw gen mawh sasan I kizil mai tau ahi. Lockdown, ikikulkhup sungun thu chuomchuom zak ding auma, zie haw chuh. Nupa’n hingal kikhum khawm kha beklo haw kina atama, adiekin London police ten nupa’n kina crime report 4093 lam hiel report a mu a, ‘stay at home & save life’ kiti chuh in ah um inla hingin tih sangin in ah um inla na zi tawh kinan tih abang hiel tai ti’n, London daily news in agen hi.

1.HIPI (Eze.14:19: Tuchunga coronavirus hih pandemic tin akigen pena, chun Bible mun tam zaw ah ‘Hipi’ ahilohleh ‘Hisie’ ti’n agena, hinla Bible a kimu atam zaw hih worlwide pandemic hilo Epidemic Pathien in agawt nuomna gam sung leh mite chung chauha tung sek haw akigen tam hi. Bible ah ‘Hi’ chuh achâng leh pestilence, Plague leh epidemic tin English Bible in agena, en chuh ‘Hi, Hipi,

Hisie, Pûl ahihloleh ‘Natpi’ tin deih dandan in imang sek hi (Num.16:48;2Sam.24:15). Bible chang kipie haw hih sim leh chun, tuchunga Covid-19 Symtom hih Lev.26:16 ah auma, mit natna; lung subuoi thei natna; Eng.Kjv ‘Ague’ hih Thahdo Kuki translation in khuhsau leh khawsikpi tin agena,Terror hi natna tizat um genna ahia; ‘consumtion and burning atih tieng leh Pathien lungnatna mei, mi kang mang thei genna deuhin akimang sek hi. Chuleh Economic siet dingdanle ana gensa him ahi (Lev.26:26). Tuhin le anchang teh detdet in, gari thau teh detdet in, chuleh idin na mun ding nasan akizik kuol detdet hita lo maw? Zie hih danleh Antichrist Goverment huna mipite khawsak ding dan symtom chuh ahi.

2.LOCKDOWN (Isa.26:20): Pathien in migilote gawtna dinga hisie alensak lai in amite chunga chu theilo dingin abawl puoa, amau kissaseng dingin ahih zaw ahi. Pathien kawmah na khutibawl zienga kiti theilo ahih ziek, bang I lawh die! I dam ut leh athu chuh zuih mai ding ahi. Zietak Bible chang ahin le Pathien

lungnat hun chawm chah sung kikhak khum ding atih ahia, ningkitel zieng tadih dah hitiu. Natna ‘hik’ do dingin kuoman hatna anei puoa, himahleh amah do ding dan chuh kawt kikhakkhum, kikulkhup chuh himai, mipy kititkhawmna ah hi le alâng dieka, kibawm tuoituo, taiikhawm dieldiel bawl loh chuh damna ahi (Lev.26:25). I pu leh pateu hunlai inle zietawbang thil atun tie hileh khawsung, insung kuomah tawh kitawtuoh lo dingin khawmuol ahihloleh huongcha ah theubawk ana tak ua, zie chuh lut phalloh tihna ahi sek hi. Tuhin le Bazar la kikhak, Sikul la kikhak, Hoin kikhak, gari kikhak kuomah kigawtchuomna hi lo, BJP ten Kristiente chauh dinga akhak uh le hi dieklo ahi. Italy leh America tenle Lockdown ana ngaihsak loh ziek un tuhin athuokpen in apang ui. Thangjom tupa, saguol, savawm masanga tai lo tih sangin khuo sung leh sapchuom hotute leh amawhpuote tih dandana um khah damna ahi tih hei tiu, Narendra Modi leh BJP ten kikhawm phawt thah ding ahun tih tieng leh ‘TAKCHAPA’ ti zieng thei dingin um zawi tiu.

3. QUARANTINE (Lev.13:5-6): Zie hih, natna hik nei ahim, nei lo, tih etchietna dinga ni bangzah him kichuom kawih tihna ahi. China gama Wuhan khawpia Coronavirus ahung kipat mapeka Moses leh Aaron kawma LALPA'N 'hi' vei etkawl ding dan ana piek chuh ahi. Thiempu'n phak natna aet tieng leh hiti hin abawl sek hi. Phak vei dinga ginmawh aum tiengleh thiempu chun en intin, avunthuol abawlna mun chuh ahung vama, avun sunglam lutthuk loa, amul le avam loh chun, ginmawh thil in ni sagih qurantine intin, bangmah atih loh chun ni sagih dang mah kawihkit nalai intin, ziea chuh alamdang bangmah aum beh sam loh chun thiempu chun athieng ahi ti'n phuong intin quarantine chuh kichai intin, zie chuh abawn in ni sawm leh li ahi. Tu hinle India te'n quarantine hun sung hih ni sawm leh li imang vantang uh abang hi (Lev.13:5-6). Chun amah chun avante sawp intin ngeina bangin um kit ina. Chun tua ,pielgal ana kaita Kros sepaikh Pu Zawmpau hile ni bangzah ahim khawmuola quarantine khak hileh kilawm! Zie lai chun 'Hihet vei, TB haw leh Phak natna haw hi tizat um leh thet um taka ana gel uh ahi. Tuhin Churachandpur Ditrcit a dinga Quarantine mun chuh

Hmar venga circuit house ahia, Manipur in asiem dan dungzui in incubation period ding chuh Bible a guol in ni 14 mah aguot ui. Bible hunlai inle damlote in sunga va lut, va ne, va giek ahim, akivawppih phawt Meitei nungak Ningambam London apat lenna ahun chutkhawmpithe ahawl guol u khan ana Quarantine zel tho uh ahi (Lev.14:47).

4. ISOLATION (Lev.13:46): Ziehiah, hi vei khat in midang akaihsawn lohna dinga kivenna phapena kimang ahi. Phak hi vei khat chuh adam kit macheng midang tawh kisukha loa amah ngawna aum ding, agieh ding, anek ding, tihna ahi. Ei mah ut leh dah thu hi lo, inkuoten ei ngaihlo ziek le hilo, ziehiah natna 'hi' do na chikhat chuh ahi. Zetawbang hisie chuh Manipur ahung tun chun, Jawahalal Nehru Institute of Medical Science (JNIMS) hospital, Imphal ah Isolation ward 6 akikawih hi. Ei haw Kristiente ding vangin phataka zuih ding chi ahi.

5. SOCIAL DISTANCING (Num.16:44): Zie hile, Gangte Bible in 'kikiengkawih' ti'n agena, khat leh khat 'hipi' kikaih lohna dinga zuih ding pawimawh pente laka khat

chuh ahi. Zie hih I thiem loh u chun lockdown hung um kit zieng thei ahi. Tuchunga Covid-19 hih scientist-ten Air-born diseass (huih puok hilo) mihing leh mihing chauh kikaih theih in agen ui. Khuti ahih vang chun mi va naih bek loa midang tawh feet 6 beka kigamat teitei ding chuh ahi mai hi. Pathien in Korah, Dothan leh Abiramte agawt ding khan zie mi ka gawt dingte laka pat hin hung kikhin dawkun ti'n thu apiea, a thi utlo cheng khah a kikhinkang uh ahi. Zie hih ei mah mimal chiet het dinga pha, mi'n ei naih kih ei tih sangin, thiemthei tako en mi va naih loh chuh Bible thumatna ahi. Government-te hin le Bible hih ana he bawn uh ka sa ten hi.

6. EPIDEMIC & ITS WAVES (Lev.26:16,18): Chun, tua Covid-19 hih khatvei atunna nunga avel tun kit ding 2nd wave, 3rd wave ahim, hut khat, hut niha ahung tun kit ding hih lauhum tak ahi. Zie Bible changa hinle Pathien in a mite a gawt tieng ahut ahutin hipi ana tun sak hi tih agen hi. Zietawbang chuh ahung tun tieng leh amasa sangin ahut nunung ahuoisie

zaw sek hi. Kihilhna dinga pha chuh Spanish flu 1819 khah ahi. Hisie ahung lén in mipite ki-lockdown khawp ta luo'n akiphin thawh hiel ui. Chun government in lockdown ahun lakdawk chuh nuom sa taluo'n, muk la tuomlo, social distancing la umtalo, apheng zap taua, ziechun hipi chuh hutkhat ahung tung kita zie chun chuh abeidawng taktak tau a, hetloh kalin mihing million tamtak hinna ala ngal hi. Chun apha tai atih nung unle 3rd waves ahung tung kit nalai hi. Zieziekchun lockdown leh quarantine haw hih ningkitel zieng loh ding ahi.

7. SPREADING SPEED (Num.16:49; 2 Sam.24:15):

Zie hih natna kithehzâk hat dan genna chuh ahi. Tuhin le ni chengin nikhat sunga (24 hrs) confirm positive (avei) zah, athi zah tin I tiemteh zel ui. Bible in le zie haw hih phatakin record ana bawl hi. Chun Kora, Dathan leh Abiram chunga LALPA'N hisie alen sak khan, Moses chun Aaron kawmah hisie ahung lengtai, kintakin tai inla meilakna kuongin maichama mei va la'n la, mipite dingin sukthien na va bawlin atia,

khutichun Aaron le a taia khutibang chun ava hih a, zie sung maimai chun mi singkhat sangli leh za sagih a thi man ui. Zie thil suok hih adakkalle hilo in minute bang zah sung ahi dem? ahat dan chuh; Chun David in mi asim khan chuh atel himhim ni thum sung ahia, zie sung khan sangsawmsagih a thi'u hi. Zie chuh nikhata sang sawm nih leh thum val thi tihna ahi. Dakkal 24 sunga thizah Italy leh USA hin le aphanai teuh puoi. Dakkal 24 sunga Italy te athih tam ni pen un tuni tienga record kimu dan in nikhat in 969 a thiu a, ziehun laitaka Italy pumpi dinmun mi 26,644 a thi tau hi. Chun USA a thizah chuh dakkal 24 sungin 1,939 ahia, Zie hunlaitaka USA gamah vei zah 9,87,029, chun a thi zah 55,411 ahiiu hi. Zie apat kivenna lampi umsun chuh achunga I gentak haw hih himai dan ahi.

8. MEDICINE (1King.8:37-38): Tuchunga ilunggimna diek u chuh Italy leh USA dinmun et in, damna ding damsawi siemsa muh hilo, adamdawi siemna dinga ahik khah zilchiet ngai, Lockdown leh Quarantine chuleh Social distancing haw le he vak zieng loa Stage thumna lam ana

tung zieng khah ahi. Israel leh America-ten la vaccine ding chauh mu thei ham, Chinate chunga alungnat ding u tawh; damlote vaccine kap theih la hilo ahih ziekin lungdong in ana um uh ahi. Iran te'n Zu dawn aphai atih zieku zu adawn ua nikhat thu'n mi 27 a thi'u hi. Achâng leh tuisa I kineppih mai sek uh ahi. Ei un chuh Sâm 91 in agen guolin Pathien chuh ei vengpa ahi ti'n I lau bek puou hi. Bible gen bangin sietna bang hileh, kielte, hisiete, gawtna khaupete, bang natna hileh gama atun chun, pauchamna, nampi paucham ahim mikhat pauchamna hileh Pathien lam nga a khut I zak phawt u chun, ngaita ding a kimansa Pathien a um hi. Chun America President Donald Trump in le March 15 Sunday ni khan America pumpi pauchamna ana phuong hi. Chuleh amah leh azi chauh le May 8, ni'n a paucham ui. Thu kipahum chuh tuhin India te'n hydroxychloroquine, COVID-19 zenna dingin akisaktheih pih ua, chun America Gilead Company-te'n Redemsivir ka mu tau hi tha thum sungin khawvel ah hawp zak theih tana ti'n agen ua, lungmuon aum hi. Abang

hileh zie buoina haw hih ni
nununglama hung um dinga
kigensa ahia, I deihpen chuh
bang cheng hihthei Pathien
a kingak zing hih ahi. Amah
chuh ei veng thei, ei sudam thei
leh i hinna kawltu ahih hengilh
lo dingin I kideihsak uh ahi.
LALPA'N a thu malsawm ta
hen.

KITUOKLOHNA LEH A SUKDAYNA DING BAWL DAN

-Rev. Khaigin Gangte

Khawvel a mihingte lak ah kituoklohna kiti hi thil um vantang khat ahi a, a lo theilo khata ngaih le ahi him hi. Chuleh, Insung tina le I tuok toh zel uh ahi kit hi. Mipi vantang kipawlkhawmna, Sapchuomte kipawlkhawmna ale kituoklohna kiti hi a bei dieklo ahi. Kituoklohna kiti hi ngeina dana um himahleh kituoklohna hin asie lam leh apha lam ah gah a nei gel hi tih het aphi.

Mi khenkhat in mipi kipunkhawmna hileh Sapchuom laka zie hi aum tiengleh ningkitel um sa a, lunggel dan ding helo a, kimawk tangkhawngaih mai le aum sek hi. Zie chu hilo in, tawbanga kituoklohna na tuokkhak tiengleh a bawl phat dan leh a sukdamna ding dan nang na muhdan leh na matdan chu nanga dinga hetbehna (experience) hung hi ding ahi. Zetawbang kituoklohna leh a bawl phatdan Bible apat neukhat vak en hitiu:-

Bible sunga kituoklohna:-

1. Thagau lam kituoklohna
 - Eph. 6:12; I Tim. 1:18.
2. Thiltup kituoklohna
 - Nasepte 16:6-10.
3. Taksa lama kituoklohna
 - Nasepte 23:16-21; Nasepte 16:19-29.
4. Insung kituoklohna
 - Gen. 21:10-17; Prov. 18:19; 21:9; 19:27; Gen.13:7;

- 26:20; Dann.1:12.
5. Mimala kituoklohnna
 - Nasepte 15:36-41
 6. Nam leh nam kituoklohnna
 - Nasepte 15:1-
 7. Lungthim kituoklohnna
 - Isai 58:1-10.

Kituoklohnna ziek khenkhat:-

1. Kimuhdahna ziek
 - Thu. 10:12
2. Chapona ziek
 - Thu. 13:10
3. Thagau lam kinakna
 - Thu.26:20-22.
4. Lungnatna ziek
 - Thu. 29:22
5. Ngawlna ziek
 - I Tim. 6:4-5
6. Itthikna, mah-angsung khuolna ziek
 - Jak. 3:16

Kituoklohnna bawlphatna dan khenkhat:

1. Mi dodala na kihet chun chieh inla va kichampih in. (Matt.5:22-23)
2. Mi dodalna a pang na hih chun kichampih dingin nangmah chauh in chieh inla, ahihloh leh palai khat ahim tawh chieh inla, thagau lama mi piting khat ahim kipuih in. (Matt.13:15-17).
3. Ahun dodalte chu kintak in kichampih in. (Eph.4:26-27; Matt. 5:25).
4. Lungsietna nei kawm in thudik tak gen in. (Eph. 4:25)
5. Siemphatna ding chauh gen in. (Eph. 4:29)

Bible sunga mahni kituoklo:

1. Ginglah leh lauhna nei – Thomas.
2. Thepthak leh nawlhthaka um – Joseph.
3. Mattaklohma muna um – Elijah
4. Kilepmang leh suonlam nei – Mosi
5. Beidawnga lungkham – Job.
6. Mah diklo leh zakcha kisa – Peter.
7. Umchuoma kizukmang – Adam leh Evi

Kituoklohma sukdkina dan:

1. A sukphatna dingin thil khat chauh ah kinga zieng kinla, thupukna na lak masangin ahithei dinga na ngaih leh geldan tampi puokdawk guo phawt in. Ahithei dinga na geldana hunglang cheng chu thuoksa hiel in gel kit inla, tiemteh pha kit in.
2. Na thil guonhaw chu a lawkna ding leh a lawklohma ding suchien in. Zehaw sukpitinna dinga a dal thei leh phachuom dingte chu sukhatna ding leh a dalna ding siemtup masa'n.
3. Kituoklohma leh buoina kiti sukphatna ding tih hi buoina phawt chu a bul um chiet ahi a, zehaw chu- **Paisa** matna lam, **Hun** matna lam, **Inkuon sung** leh mah kigeldan leh a dang dang ahi thei sek hi. Kituoklohma sukphatna dingin abul taka hawlpat angai a, buoina khenkhat kihetdan chun a bul hilo in, agah (symptom) lam buoipih masak theih ahi sek hi. Agah pen chu ngailthah ding tihna hilo in, zehaw chu hetchet ahih tiengleh khatvei thu a sukphat theih, hun sawt ngailo le himaithei ahi.
4. Kituoklohma chuom chuomte chu achuom chieta damna pen chiet dinga thupukna thitchil ding, alangtuok in a pawm theihna dingun. Zie umzie chu- **A kuo zawk in bang pen ah, Khawitak ah, Bangtik in**, tih leh **Bangti'n**, achangleh **Bang ziekin** tihte hi genchet kei ding ahi.

Palai a pangte hetding:

Apha thei pena kilemna thu sukhet ding ahi a, **Hung hi pai in a, kilawm tho, kithuohpih theih, Inveng ding chi ahi**, tih thumal leh adang dang kichienlo a hihloh ding ahi. Na holimpik

tieng na thugen leh holimna chu bangtin a ngai in, ahun limsak em, tih na het guot ding ahi a, thu ngaihthak kiti hile a thiem leh a thiemlo aum ui:

Thu ngaihthak thiemlote:

1. Thupipen thenga sukbuoi ching.
2. Tukvelh lam mitkah a mi enlo hiel.
3. Ningkitela lunglut lo taka um.
4. Pung buhlai en a ham ham zieng.
5. Thugentu'n thusim lungkham um deuh a gen tiengleh hi, kei chunga le tung sek ahi ti zieng.

Thu ngaihthak thiemgte:

1. Luchang su ngeuh ngeuh sek.
2. Thugentu lam en zing sekte.
3. Thugentu lama awn deuh zing.
4. Chawmkhat chauh vak kizeh.
5. A thugen a ngaihsak a, a gel a, mahni'n ngaihdan nei a gelchien sek mi ahi.

Thu ngaihthak hawih gahte:

1. Thu kigen hawihtaka ngaihthak chun mipite thatho taka um theihna leh thu kigen pen ngaihkhawkna dingin boruok a siem hi.
2. Thu kigen hawihtaka ngaihthak chun kipumkhatna a siem hawih a, thugentu leh ngaithate kala kiginchak tuohna a siem hi.

Thugen hawihtaka ngaihthak chun kilungsietna leh kizahna thugentu lam ah aum sak a, thugin lam, thumal mat ahim, a umdan ahim ngaihkhawkna leh demna a um sak puoi. China te thuching in, “Ngaihthak kiti hi thil li (4) etsakna ahi a, zie chu- Mit leh Bil chengin kikhen chuomlo hiela a ngaih sak uh ahi,” a kitii.

SAICHANG BIEL

SAPCHUOM PUITU MI MASATE CHANCHIN

CHAWMKIM LEH SANTING JUBILEE

KAWNA SUONGPHUH HAWU

Kum 1912 October/November vel in Sawlchak masa, Pu Thangvang leh Pu Damsuok te'n Chanchinpha SAICHANG khuo ah ana puolut ui. Khuolai ah kikhawpna a neihpih ua, “Pathien apat taimang I hiu a, A thu awite chu a umna ding un mun nuomtak a siem a, zie mun achun puikhawm intin, a thu awilote chu GAWTMUN a kawih ding ahi,” ti'n. Thu a genzawh un, “Kuo a Khristien hidinga min pie nuom,” ti'n chielna a bawl ua, anuoia te hin amin uh a pieu hi:-

(1) Thuohpau (2) Kaithuom (3) Buldal (4) Lientinmang
 (5) Lienkhopau (6) Lienkim (7) Nekdawng (8) Khupdawng (9)
 Thangkhopau (10) Lientinkai (11) Thangzam ahiu hi.

Amin uh a khum zawh un, lungthim thiengtak in, “Thil, bang banga ka hihloh ding uh, Tuibuk muom, Dumbel chep haw hih Pathien thu awih puma hihtheih ahi dem?” ti'n a dawng ui. Zan leh khuolai a Meitoul tикин, kikhawpna a nei sek ua, Pathien thu a hetkham khamteu gen in, paucham khawmna a nei sek ui. Kum 1913 vel in Ho-In masapen ahun sau a, adung- lam nih leh akim, avai- lam nih ahi.

Kum 1913 in Lailong-L a, Pu Vungkap (Kappu) Thangkhawsawi pu hin, Pathien thu ana puolut hi. Pi Ngaichin hi zie apat chuh Pathien thu awi masapen ahi. Kum 1914 hin Ho-In ana sau hi. Ho-In sate- Pu Vangkap, Pu Henpum, Pu Awnthang, Pi Ngaichin, Pu Lamzapau, Pu Lunthang leh adang dang ahiu hi. Evan. Thangler hi 1st January, 1920 kum in Lailong-L ah ava um pan hi. A kum tun in, Pu Sawngvang in siel khat a tuok a, Kristmas a mang ui.

Kum 1914 hin, Pi Kawpzating, Mr. Khuplet leh anau Zawmpau te'n Khanpi khuo ah Pathien thu ahun awi pan ui. Kum 1918 February 22 in Evan. Thangzakhup hi, Teikhang a Mission nasem dingin sawl ahi. Pathien thu a gen sek a. Zie lai hih Hausa thuneihna sangtak ahihlai ahi a, Nawhdawk zolo in, Sakei lam kanna (Sakei zawi) ah In

neucha saksak in, a chensak ua, tha gup sung a chen nung inle Sakei in bangmah a lawh puoi tih a het phat un, midang inle Pathien thu ahun awi sau sau tau hi. (1) Lamzathang (2) Thienkim (3) Tingkhonieng (4) Zamkhopau leh (5) Kimnu ahieu hi. Evan. Thangzakhup in a nutsieh nung, tha gup zawh in amau cheng hih a haikit tau hi. Hun sawttak nung in Pathien thu awi ding minkhum ahung um kit tau a, kum 1947 in- (1) Sawikham (2) Thienkhawpau leh (3) Paukholien (Bawilien) te'n amin a khum kit ui. Ho-In le ahun sadawk ua, Pu Sawikham in Ho-In a hawng hi.

Kum 1918-2018 kum 100 (Centenary) atitna Teikhang khuo'n a mang tau hi. Mr. Khuplawmsang, Santing a Pu (L) Thienpau chapa lienen, apu Evan. Thangzakhup minlo pa chuh, Teikhang khuo a Sapchuom te'n sam in, apu Evan. Thangzakhup zala Chanchinpha kum zakhat "Centenary" lawm in, Thilpiek kilawm tamtak tawh ahun pieu a, Date 21-02-2020 (Saturday) ni'n Santing, a chenna khuo ahungtung kit tau hi.

Kum 1918 October/November tha tawp lam in, Evan. Thangzakhup chuh Teikhang apat in Siempat khuo ah ahung pemlut hi. Pathien thu ahun gen lai in, mi thumte chun Pathien thu chuh ahun awi tau hi. Amau haw chuh- (1) Pu Pauthuom (2) Pi Zamnieng leh (3) Pi Pichong te hih ahieu hi.

Kum 1954 khan NEIG Mission Khawmpi, Nghathal khuo ah aum a, mahni pau chiet a Sapchuom phuh a din ding in thupukna ahun nei tau hi. (1) ECA (Hmar) (2) ECC (Paite) (3) EOC (Vaiphei) (4) ESC (Gangte) (5) KCA (Thadou-Kuki). Kum 1979 khan SEMACA (Anal) te le ahungtel ui.

Ei uh EVANGELICAL Synod Church (ESC) hih 1954 apat in 2020 tieng, Pathien panpihna leh hehpihna vangin eimau kenga ding liei-liei nalai in I um tadih ui.

Saichang Biel HQ. Santing khuo a, Jubilee kawn a Sapchuom mi masate suongdawh hih, Sapchuom NEIG Mission a I kikhen uh kum 1954-1978 tienga, Evangelical Congregational Church (ECC) a I na um uh kum 25 (Silver Jubilee) titna suongphuh chuh tuni tieng hin ading nalai hi. Zie Jubilee Khawmpi akimatna ahin, "Lalpa chun thil

lopi takte ei hihsak a, ka kipak ui” Sam 126:3 na hih suonga zik ahi.

Kum 1979-2004 chan kum 25 (Silver Jubilee), Saichang Biel Khristien Khanglai Pawl te'n Pathien min lopina di'n, zie Khawmpu hih ana mang ui. “Na nasep chuh na sawntawlawi haw kawm ah kilang henla, Na lopina chuh a chateu kawm ah lang hen,” Sam 90:16 tih thu hih suonga zik ahi. Ahawngtu ahihleh, Rev. Khaitinthang, D/S. ahi.



Kum 1957 – 1997 (Kum 40) sung, “Khristien Khanglai Pawl” Pathien in a puihuoina zieka kipahna suong ti'n ana dawh ui. “Aw Lalpa pathien, kum 40 sung Khristien Khanglai Pawl te nei umpih ziekin, Na lopina ‘PUONLAP’ lungkiguol in ka dawmsang ui, tih hetzingna'n zie suong hi ka phut ui. Khangthak hung um zel dingte'n le NANG ahun hetzingna ding un,” tih thu hih suongphuh achun zik ahi. Ahawngtu chuh, Rev. K. Thuomngell ahi. Date 16-1-1997 kum in.

Kum 1951 – 1954 (Kum 4) sung hih, Pu Thongzakham hin New Testament, Gangte pau in ana lehdawk masapen hi. Zie suongdawh hih Saichang Biel Kristien Khanglai Pawl te'n ana guonggalh uh ahi. Ahawngtu- Rev. (Retd) T. Selluo ahi. Date 26th February, 2003.

Kum 1954 – 2004 (Kum 50) Golden Jubilee suongphuh chuh Saichang Biel District ESC'n ana dawh ui. “Krista thubul kihilhna lam chuh dawn talo in, pitinna lam zuon hitiu” Heb.6:1). Zie thu hih zik ahi. Ahawngtu: Rev. (Retd) T. Selluo ahi. Date 5th November, 2004.

Kum 1886 – 1951 (Kum 65) Evan. Zawmpau, Cross Sepaih tih, minvawh le ana hi. 1914 in Kristien ana hi. Gangte Biel a Solfa thiem masapen ahi. Pathien na ana sep haw:-

- (1) American Baptist Missionary (ABM)
- (2) Cross Sepaih in kum 10 a sem hi.
- (3) Tirko in kum 1 a sem hi.
- (4) School Teacher in kum 1 a sem hi.

Pathien La go, 20 a phuok hi. Date 11.3.1951 in a Lalpa kawm ah a chawl tai. A u, Evan. Khuplet in a suong hih a dawh ahi.

Khanpi khuo ah Date 6th November, 2011 kumtawp lam in Saichang Biel Synod Women Society (1961-2011) kum 50 titna Golden Jubilee a mang ui. “AHUN CHAA GAH ZEL” (Sam 1:3) tih thupi a mang in suong a phut ui. Ahawngtu leh a latna: Rev. K. Siemlien, B.D., Biel Superintendent, Saichang Biel in a nei hi.

Maumuol ESC kum 50 (1910-1960) Golden Jubilee (NEIGM) Kumtawp lam October/November vel in a mang ui. “Chun kum sawmnga na chuh na nit thiengtho ding uh ahi a, gamsung pumpi leh a mipite a ding zalenna na phuon ding uh ahi a, nang uh a dinga Jubilee hiding ahi. Mitin in nangmau a mah kha nei kit in na tin uh, mitin nangmau Insung chiet ah um kit un lau. Suoka zawka umte cheng chule amau Inkawte kawm chiet a a chieh kit vek dinguh ahi,” tih thu hih suonga zik ahi. Ahawngtu: Rev. T. Selluoi.

Date 8th February, 1986 kum in Lailong-L khuo ah Saichang Biel Numei Pangguol pawl te'n Khawmpa a matnau ah, “Silver Jubilee” (1962-1986) suong dawhna a nei ua, “Zie hih Lalpa mi guot chuh ahi a, kipak in lawp hitiu” (Sam 118:24) thu hih a zik ui. Ahawngtu: Pastor Nekkholam, D/S.

Date 7th May, 1963 kum in Lailong-L khuo ah NEIG Mission in Jubilee kum 50 na atitna (1910-1060) suong a phut ui. “And ye shall hallow the fiftieth year” (Lev. 25:10) tih thu hih suong ah a zik ui. Ahawngtu: Rev. T. Selluoi.

Ka kipak takzet hi, achunga Saichang Biel a Sapchuom puitu mi masate chanchin leh Santing Jubilee kawna suongphuh thu zik hih akimlo le um in a, I kihetthiemnau ka hun ngen a, Lalpa lopina chang zing ta hen.

- *Rev. T. Doukap,
Biel Superintendent,
Saichang Biel, ESC.*

NSSU TEACHERS' TRAINING & BIBLE SEMINAR

Jiribam Area NSSU Teachers' Training & Bible Seminar, Sinsaktute: Nk. Chinbawi & Rev Dr Ellien Gangte, Amun: Centenary Chapel, ESC, Jiribam ah March 19-22, 2020 sungin "Thutak chun hun zalen sak ina" Johan 8:32 thupi mangin neih ahi. Pathien lungsietna zalin Sapchuomte leh a diekin NSSU Sinsaktu hung telte lunglut takin a pang u a, a nuom mah hi. NSSU Teachers' Training ahin duhthusam bang takin mi tamzo kimahleu le gûntak a neih ahia, Pathien lungsietna zala a phatchuompih uh kinep aum hi. Sinsaktue um ding dan, Sinsak dinga kisaklawk dan, sinsak dan, naupangte nungchang leh a dang dangte kisinsak hun a mat ahia, kipak aum hi.

Bible Seminar hi Nitak cheng a neih ahia, kuole khenchuom umlo a, Sapchuom mi a nuom cheng tel theih a mat ahi. Sapchuom dang mi hun tieng a hung tel ua, chuleh Meitei ginglo hung kikhawm le aum ua, a nuom chuom mahmah hi. Pathien Thu Thilsiebul apat Thuphuon chan, a pawimawh diek miching, mithiem te'n a muhdawk hawu a lim tawh kithuoh a kisinsakna neih ahi. Tulai a Natna hipi Coronavirus zieka khawvel a haksatna hung tungte hezing kawma Eden natna 'Thagau Coronavirus' I neih uh sudam thei Krista Isu I beluh a mamawh dan kisinsakna neih ahi. Pathien lungsietna zala gilo hih kihe a, Lalpa bel a, kumsawt tatna gingcha a, piengthak le aum ui! India Coronavirus Lockdown in ei huom khak ziekin hapta khat umbeh ahi. Ka umbeh sungun Sapchuomte laka khenkhat counseling neihpih ahia, chun kikhawpna tele nei zawm zelin, kipak takin hunte matkhawm ahi. "Chun, Pathien hehpihte, Amah guot guola a sapte ding chun, a phatna dingun bang chengah a sepsak sek hi tih I heu a;" Rome 8:28. Lalpa Isu Krista, I Tanpau chu lopina I pieu hi. Amen!

Sd/-
Rev. Dr. Henkholien Gangte
Director, BCE
May 7, 2020

CHAMNA AW PATRON MEMBER LIST

CHIEF PATRONS:

1. Pu S. Paukholal	Chief of Bunglon	1994
2. Ebenezer Chapel	D. Phailien	2014
3. ESC Shillong	Shillong	2014
4. Mr. S.K. Juiliana	Lamphel	2014
5. Nk Sawmte K. Gangte	Fujairah, UAE	2015
6. Nk Esther Tinglamkim	Gangte Veng	2015
7. Pu Thangzago (K.Vawmcha)	Chiengkawnpang	2015
8. Langol ESC	Langol	2016
9. Mrs Hoisi W/o Laldawng K. Gangte	Jiribam	2016
10. Upa Letkam	Bunglon	2016
11. Pu (L) Kamgo K. Gangte	Phuolsanbung	2016
12. Shillong Local Missionary Board	Shillong	2016
13. Pu Lunkholal Gangte	New Delhi	2017
14. Pu Noksieki	New Lambulane	2018
15. Nemkhola	New Lambulane	2018
16. ESC Gangte Veng M&B	Gangte Veng	2018
17. Nk. Nancy Nemneihvak	Hill Town	2019
18. B. Lalven	Lamphel	2019
19. Ginkhothang S. Gangte	Throiliuok	2020

PATRON MEMBERS:

1. Pu Henkhojam	Siempat	1994
2. Sep. L. Gangte	5th Assam Regt.	2003
3. Dr. Lalzazdal	Chiengkawnpang	2004
4. Upa Niala	Shillong	2004
5. Pu P. Gangte	Shillong	2004
6. Pu B. Manga	Shillong	2004
7. Pu S.T. Gangte	Shillong	2004
8. Pu Lakithang	Delhi	2004
9. Rev. Dr. Soson	Dimapur	2007
10. Rev. T. Kampu	Guwahati	2008
11. Pi Phalneiththiem	Dehradun	2008
12. Pu B.K. Gangte	Dehradun	2008
13. (L) Hengo	Chief of Chongmun	2010
14. Upa Dr. L.S. Gangte	Chiengkawnpang	2011
15. Pi Niengzalam	Chiengkawnpang	2011
16. Pu Sangvung	Chiengkawnpang	2011
17. Pu S.K. Gangte	Shillong	2011
18. Pu Lovejoy	Kohima	2013
19. Pu Goginthang	Shillong	2013
20. Pu L. Minlun Gangte	Shillong	2013
21. Pi Lalkim	Shillong	2013
22. Hav. H.L. Gangte	Shillong	2013
23. Ms. Grace Lalbiek	Guwahati	2013
24. Pu L. Neihsiel	Shillong	2013
25. Pu Lamtinlien	Shillong	2013
26. Pu S. Thienlaljoy,	SDO H.Q. Veng	2013
27. Pu L. Sawia	Gangte Veng	2013
28. (L) Lt. Col. L. Gangte	Chiengkawnpang	2013
29. (L) Upa K. Manga Gangte	Shillong	2013
30. Rev.Dr. Th. Lamboi Vaiphei	Hill Town	2015
31. Pu K. Pauboi Gangte	Chiengkawnpang	2015
32. Siemlaljoy	Lamphel	2016

DIAMOND MEMBER:

1. Upa Lamkholam	Chiengkawnpang	2015
2. Mrs Felli	Chiengkawnpang	2015
3. Moizokim (Chloe)	Lamphel	2015
4. Pu Lame B. Gangte	Langol	2016

GOLD MEMBER:

1. Pi Niengneihchoi	New Delhi	2014
2. Agape Children Eng. Jr.H/S.	Ithing, Thanga	2016
3. Upa Th. Mangnug	Bunglon	2016
4. Pi Chawimawi	Lamphel	2017
5. Pastor Gouliennang & Family	Tripara	2018
6. Muntha ESC	Muntha	2018

SILVER MEMBER:

1. Pi Sailothangi Thangzom	Old Lambulane, Imphal	2014
2. Antioch High School Abicharan	Tripara	2014
3. Upa Thanglal	Bijang	2015
4. Upa Laftinthang	Gangpimul	2015
5. Lamneihhat	D. Phailien	2018
6. Pu Sonpee S. Thangzom	Lamphel, Imphal	2018
7. Pu P.L. Manga	Lailak, Mizoram	2018



NSSU Teacher Training Jiribam

*Published by Rev. T. Kongon on behalf of the Evangelical Synod Church
Printed at: THAWNSAUA PRINTING WORKS, CENTRAL LAMKA*

Alak man apat ₹
If undelivered pliz return to:
ESC SECRETARIAT,
Chiangkawnpang, Churachandpur,
Manipur - 795158

Channa Aw
(Evangelical Monthly)
Regd. No. 64436/96
E-mail:e7s7c7@gmail.com
www.synodchurch.com

PIN

--	--	--	--	--	--